

四庫全書

集部

欽定四庫全書

集部

鴻慶居士集卷十四

五

詳校官右中允臣薩敏

主事臣呂雲棟覆勘

總校官降調編修臣倉聖脉

校對官編修臣徐立嗣

謄錄監生臣方維翰

欽定四庫全書

鴻慶居士集卷十四

宋 孫覲 撰

啟

回周解元啟

桑榆晚自笑陳人雞黍招邀但思故友敢求交一時
命世之傑尚詘體諸生修贄之恭車轍在門文書銜袖
判羣言于三語窺小異於千人公是韓伯休耶莫如一

覩竟識袁彥道否殆愈百聞恭惟某官從之解元背世
獨馳牧人共棄聳牙犀和礪砢交難空傳陽春白雪之
音莫究流水高山之意鄭人腊鼠通國皆然葉公畫龍
識真者少不謂勞薪之感自周投芥之機兩窮相遭一
笑莫逆微言覺後固將俟一千歲之清妙語吹生自足
勝億兆人之詛高情如此俗慮難量偶同氣聲之相求
遂索形骸而固間愧無瓊玖之報珍投但賦角弓以為

永和

回古州王守啟

擢須賈之髮方從溺箒之誅覽使君之鬚粗識撫箒之意念孤暗莫能勝一國萬人之詛而寸膠自足制九河千里之渾茲蓋伏遇某官存錄故交恢大崇惠方伏枕對懸蛇之俎聊釋耒以自娛而亟書下羅爵之門遂攝衣而拜辱高義薄雲天之表正聲皆韶濩之音汰溷濁以揚清奮懦庸而立志張弓挾矢嘗觀白雉之翔戴笠乘車尚記丹雘之祝窮途易感沒齒難忘

回趙解元啟

十年賦就早以文名九牧聲馳驟喧楮價有光帝籍遂
秀儒林恭惟君拙解元文章玄豹之姿骨相蒼龍之種
藉累世服冕乘軒之貴而自同于布衣起方丈列鼎鳴
鍾之族而不飽于齏鹽餐秋菊以療飢紉春蘭而為佩
囊螢聚照摘葉記遺故紛然在羣公子之中已卓爾冠
諸老生之上旁觀血指汗顏之斲獨揮却日之戈下視
槍榆空地之界忽展垂天之羽本初之徒不數自鄙以

下無譏薦目初傳輿情允屬盛服立公門之外孰為魯
國之多儒奏篇陳乙夜之觀又睹漢廷之三道雅遊之
久賀問宜重重紆緹騎之臨遠貽誨函之辱其為欣荷
莫究頌言

洪秀才回啟

五色相宣眩若補天之石一鳴莫應鏗然擲地之金遠
陸珍函亟俯大貺恭惟某人學問得師友淵源之自心
期惟吾黨聲氣之求雖南北之方風馬牛不相及也而

臭味一族磁石鐵猶有間焉計拙幾類于集枯書癖蓋
存乎是古酒舉一尊而共盡待李白以細論詩傳四座
以皆驚聽許渾而有作

回胡粮科啟

三世青箱之學卓冠儒宗一時黃絹之辭具存家法函
書臨授躡履趨迎繆膺先進之恭深切後生之畏恭惟
某官學窺聖域文授國華重五十席于講肆之間奏三
千牘于公車之下貴名日起一坐盡傾俊辨風馳萬夫

皆廢家傳衣鉢固應在龍虎榜中世掌絲綸又將集鳳
皇池上猶勞謙于下問欲宏益于多聞聆妙寄于哀彈
雖粗識流水高山之意委殊珍于大賤終莫報明珠白
璧之投感頌之私占言難盡

回除守魏寺正啟

戴望天之盆未快昂霄之覩擁埽門之篲空懷按劍之
疑遽流問以先之繫過聽之誤矣恭惟某官該明古記
允蹈先民訪南國之棠于斧斤殘敗之餘弔峴山之刻

于兵火焚漂之後儒雅二賢之斷風流一代之宗覽故
物以興嗟撫頽基而悼廢鼎新舊觀駿惠前模草木欣榮
山川炳煥重以無窮之托屬于不腆之辭若鸞膠續絃
之竒固未易得也而狗尾代貂之乏夫豈不誤哉承命
靡皇臨書增愧

二

昔從郎吏嘗佐春官遴選之公敢謂陳人尚玷門生私
謝之禮三十年恍如隔世八百氏存者幾人獨見大賢

粗免明月暗投之愧追懷故老可見青雲異日之心恭
惟某官學邃而自得師文高而不近俗雖彤芝九莖之
秀快觀宜先而朱弦三歎之音識真者少有來幣聘出
應弓招三年不鳴固有待然萬選必中夫何疑者重勤
簡記嘗預題評拜貺惕然為禮過矣窺豹孰知其大尚
推子敬之賢見龍而懼其真自笑葉公之陋

回宜黃鄧令啟

自投黜暗莫望高明每想孟嘉之風流固應小異未謝

紫芝之眉宇空有此生遠膺伐木之求大慰望梅之渴
恭惟某官文傳家法學冠儒流居間臨民燕坐得擁紉
之佚正容悟物鶚林懷食甚之甘大啟黉宮作新進造
追蹤千載壯觀一時洋洋絃誦之音藉藉舞雩之詠偉
矣大賢之事業蔚為多士之儀刑猥屬庸虛謬當紀次
賦滕王之高閣輒援筆而不辭續淮西之仆碑但臨文
而自愧

回沈解元啟

每傾遐想未卜前瞻緊國中寡和之音久抱絕絃之歎
而海內流傳之句獨先染鼎之嘗忽聆鈞天之奏合作
于九成欲使屠門之嚼屬饜於一飽歡呼拜賜鼓舞和
榮恭惟公序解元經術之邃該百家詩律之妙兼七子
高深侔海岳懸牙籤三萬軸于胸中幽妙感鬼神奏錦
瑟五十弦於筆下願屏處窮閭之陋亦剽聞高義之餘
風馬雖不相接于殊方鷓蜮固自有同於舊識遽膺大
貺遠隆雄篇恍如望洋者之眩迷津端若噉蔗然已入

佳境盡發錦囊之秘驚窺金盞之華聯彌明石鼎之詩
便當閣筆讀沈約郊居之賦謂是知音欣頌之私占言
難盡

回葛教授啟

箕斗之虛名偶然過聽珠璧之大貺率爾暗投汗集愧
顏光生暮齒恭惟某官四海譽髦之士一時人物之宗
秉青藜而讀書擁絳紗而授業舞雩高蹈跨祥鵬八極
之遊理窟冥搜襲神龍九淵之會曲敦世舊見謂儒

先發重諾于千鈞溢高詞于兩喜寔大人先生之模範
為小子後進之儀刑豈惟陳人獨膺大貺其為欣荷莫
究名言

回方簽判啟

少狂而妄屢登搏虎之車老退而休遂返屠羊之肆豈
謂幕府文書之暇首訪窮閭貧病之餘拜嘉惕然過聽
誤矣恭惟某官筆探韋編之邃談定肉譜之評出焦
尾之木于爨薪而絙以朱絲起病顙之駒于下駟而靡

之青路雖寒溫未接數日闕然而臭味相求一見決矣
斷絃挂壁已絕意於賞音載酒隨車欲過門而問字即
諧素願預激懽悰

回許解元啟

粉榆故里久已復於民編蒲柳殘年獨未書於鬼錄况
一時之俊重聯瓜葛而兩地之隔如望參辰恭惟某人
學術皆有本原文章自應律呂聞暴公子之義空與見
晚之嗟讀元道州之詩深切後生之畏首紆高躅申貺

好詞疊疊如炙輠之無窮混混若建瓴之莫禦老矣無能為也莫助一鳴眷焉何日忘之以為永好

回鎮江劉節度使啟

伏審齋壇授鉞幕府建旌閫寄方隆國勢增重切惟將相安危之繫良以君臣會合之難高帝嫚士而陸賈陳詩書之言孝公圖霸而衛鞅談帝王之道鬻冠遠越操琴求齋據鞍拊兩髀而驚操楮感二毛而賦丹心猶在悼歲月之不留華髮半空悵功名之已晚恭惟某官著

節艱難之際奮身徒步之中始悟意于一言遂收功名
于百戰黃麻誕告阜纛前驅草木之名江山改色逢辰
若此振古無倫孰云千八百諸侯之多見謂三十六英
雄之冠方脩慶牘首墜誨函隋珠分照乘之光為賜厚
矣燕石論投瓜之報何愧如之

回周解元啟

誌幽堂之石方懷翫斲之慚墜記室之書遽沐褒嘉之
寵溢言過矣愧汗泚然竊以字三鱣而製碑米千斛而

作傳立道旁碣豈免愧詞諛墓中人遂非實錄繫大孝
有無窮之慕待斯文為不朽之傳雖兩地相望聞風有
素而兼金不受授筆何嫌伏惟某人挺生孝秀之淵獨
冠賢書之首感風樹而千鍾之養弗汨御祥琴而三年
之愛未忘將永賁于松楸宜大書於琬琰願匪黃陵之
筆附韓子以知名庶幾峴首之碑思羊公而墮淚

回徐守計議啟

命呂安之駕寧辭千里之行卧陳登之樓何止一床之

間不圖晚接獲預英遊恭惟某官襲一經之訓以傳家
屈千金之尊而下士諸儒談道舍蓋叟于堂中五馬班
春伺陶公于道上春言貧病已迫衰殘早登相國之門
雖屢擁膝行之篤晚過荊州之願方跪陳贄見之書忽
紆汗簡之光采極背芒之負高論逼蛟蛇而起立英詞
冠日月以光明陳義藹然勞謙過矣碩老生陳腐之說敢
申拔薤本之規繫流年晚晚之餘但有分棠陰之意其
為欣幸曷究頌言

回運使張直閣啟

解楚囚之冠偶遂乞憐之請抱漢陰之甕茲惟待盡之時屬開登車攬輿之初空懷擁篲埽門之意恭惟某官疏通不器深厚而文乃眷全吳之雄暫付外臺之寄埋一輪於道上方司三尺之平列萬躬于潭中坐致千倉之富曲存留落遠墜誨音繆當銀筆之題榮過袞衣之寵縱軀委命自從魚鳥之求悼屈哀窮莫戴江山之重

回強守奉直啟

凭熊軾而驅方切仰高之慕卧牛衣而泣莫申事大之
恭敢謂漂流契濶之餘尚存撫奄矜存之意恭惟某官
七朝儒學一世吏師萬乘之器晚成千歲之姿難老爰
屬下車之始遽切求舊之先著履懼迎詎知折齒撫箠
歎詠殆欲挽鬚高節邁倫哀貧增氣諸儒談道所願陳
蓋公清淨之言小子學詩猶能賦王褒中和之頌

回莊守右司啟

書名罪籍久謝冕裳竄迹窮閭遂編農圃追南柯之

夢悟破甑之已空
瞻北斗之高知戴盆之難望
茲益伏遇某官金馬石渠之彥
鸞臺鳳閣之英入陪帝席之前
出殿侯藩之重仁風揚扇折中山
千日之醒甘雨隨車
溉桑林七年之旱首紆柔翰申
貺好辭擲地作金石聲
濕楮皆冰雪語哀憐故物辱在泥塗
振拔危蹤援之溝壑道逢醉尉
頽常懷訶罵之虞天惠仁侯詎復興鄙夷之歎
其為欣幸莫究言名

回吳守啟

勾吳泰伯之祠血食如在延陵季子之墓封樹猶存雖
桑田已化滄海之塵而闔閭尚帶松江之水眷此一都
之會介于二邑之間恭惟某官故國之世臣本朝之循
吏昔鼻祖稱冠百王之表今耳孫猶存三讓之風指若
里之社宛然視所想之棠沃若九芝塗詔三祖過家周覽
四郊皆青毡之舊物獨餘一老翳白首之遺民欣頌之
私占言難盡

與錢守舍人啟

制碧海之鯨一時獨步暗青雲之雉十月爭先逮茲叱
馭之初居有望洋之歎恭惟某官文高兩禁學邃羣書
視草北門卧八埒之日剖符南服揚一扇之風秉節尊
塗褰帷問俗扶藜共仰空巷來迎願執鞭從尚作楚囚之
泣許著帽進庶寬性緩之誅欣頌之私占言難盡

賀權守提舉啟

百舍懽迎大慰來思之詠一厘幽屏未降既見之心恭
惟某官應五百歲大賢之生分二千石刺史之重雖執

鞭之慕固非一日而操篲之見獨後衆人心渴塵生背
寒芒負豈惟燕雀同欣賀厦之成固有鶴鶴獨喜巢枝
之北其為欣悅莫喻名言

賀沈守到任啟

候館占天方驗使星之出斗城分土又觀鄉月之引共
興降晚之嗟舉有來蕪之喜恭惟某官東陽世胄北斗
人豪風流追八詠之餘儒雅繼五賢之後三刀夢協千
騎鼎來仁風授扇而行甘雨隨車而至解陳蕃之榻誰

為孺子之獨登賦梁王之園豈恨相如之未至

賀周守到任啟

傾北海之尊嘗分光於一日擁東方之騎亦均覆于二天
眷幸會之非常喜餘生之有托恭惟某官先世賢胄今
代人豪公瑾之英烈尚存舊存之風流未泯百年垂裕
千里蒙休輟神館之清資付專城之重寄羣兒爵躍已
大喧騎竹之迎一老龍猶尚能追吹壘之隱即諧瞻拜但切

欣愉

回王倅學士啟

早紆郡綬尚記褚褒半面之薪晚卧民間真同夢得九年之謫逃空已久集菀何由笑昨夢之已非悵舊遊之安在茲蓋伏遇某官孤風立懦大惠哀窮屈別乘於一障之間訪故文于百罹之後尺書慰藉里俗驚觀雖雁鷺何有於去來而金石不移于燥濕九霄之路莫瞻鳧鳥之飛翰十襲之藏永秘鸞經之妙墨

回王倅大著啟

盛名之下久矣服膺老病之餘頽然待盡自非素席門
墻之舊豈敢遂陳于牘之私茲益伏遇某官躬厚德以
鎮浮墮高文而起廢想鈞天之夢恍聞金奏之音騰織
女之箱約若星圖之爛闕管詎償于快睹搖旌采極于
坐馳安用著書賦九年之謫便當搶酒分一日之光感
頌之私占言難盡

回張倅寺丞啟

雲霓之夢久矣方興來慕之謠桑梓之敬缺然未快爭

先之睹敢圖挹損尚軫哀庸恭惟某官精神交海內之
宗聲名動天下之宰肆求善類丕闡斯文雖北際南垂
判若參商之異而東傾西應自同肝胆之如屈高誼于一
紙之書訪陳人于三家之市藹藹如雲之態度已立見
于囊中濯濯似柳之風流會意求于坐上其為欣幸莫
究名言

回向倅朝散啟

望切雲之冠居有絕塵之歎操順風之篲尚稽贄見之

恭屬分領于郡條已大懼于輿誦恭惟某官心存泛愛
義不遐遺訪故侯于廢錮之餘追前哲于感興之會
重勤緹騎遠隆誨函十襲珍藏已眩巾箱之富一尊燕
語佇分燈燭之光欣愧交懷占言難盡

回陳倅朝散啟

除書初下見梁木之有依刺字已漫望舍門而未埽室
懷慙于不敏遽馳義以相先恭惟某官愷悌宜民勞謙
下士暫駐松楸之國寧論枳棘之栖別乘鼎來坐龔黃

而共理鈴齋坐嘯仰岑范以蒙成父老歡呼里閭驚聳
據大床而高卧方觀一世之豪下懸榻以起迎敢占諸
公之右

回洪倅學士啟

蓬萊方丈早窺雙壁之連雲夢南州又見一枝之秀頤
服膺之已久念脩贄以無因恭惟某官文中兩科聲馳
九牧倚牛角而獨唱和者幾人跨鯨背以遠遊超然萬
里陳義振哀窮之惠占書以起廢之文末路增光哀顏

動色誦佳句于百寮之上固已習于剽聞識小異于千
人之中獨未先于快睹

回晉陵曹宰到任啟

投畀窮陬僅存殘息追懷故友但有宿心宿聽下風佩
腰章拊松楸之國方圖上日斂手板修桑梓之恭恭惟
某官學冠時髦行為世準太廟龍文百斛之鼎東序蒲
牢千石之鐘雖一時共推華國之文在三尺猶累長民
之寄鳧鷖之行序進豺狼之路當前起彈柱後之冠自

執太阿之柄竹聞治狀俯慰民瞻某晚餘生栖遲末路
托一雷之上幸分河潤之餘墜五雲之書更被袞褒之
寵其為欣荷莫究名言

賀梁守到任啟

四海聲名夙著儒宗之望一時人物獨高政事之科方
啟共理之求允屬承流之寄恭惟某官勞謙下士居簡
臨民哲文王之蓋臣豈弟古之良吏擁東方之騎已大
慰于遐瞻憇南國之棠宜少留于高躅觀二天之風采

溢千里之春聲自憐投老之餘獲占分光之地繫大賢
之高致奚俟先遊綴賀客之下陳自慙未至

回沈倅到任啟

坐井而窺那能見大面牆而立祇自書空欲詣元禮而
素無通家之因未識魯山而空有此生之歎居切畫龍
之慕莫申執鴈之恭恭惟某官養義之氣浩然名世之
才卓爾位上大夫之列盍專右省之車分半刺史之權
尚擁治中之駕不圖過聽之誤遽形流問之光妙語垂褒

朽質增重惟清廟瓊璠之器方當待賈之初而窮途枳棘之栖乃有分光之幸其為欣頌難盡名言

回周主簿啟

望堯堦八彩之光親承大問陳漢廷三道之要遂決殊科士歆稽古之榮朝有得賢之慶伏惟新思主簿妙質備琳琅之美瑰材挺梁棟之資金鑿千萬篇而百神所司銅柯四十圍而九年莫挽夙富博大淵源之學發為雄深辨麗之詞切中事情非老生常談陳腐之說工言

治道寔生民一時理亂之機甫上奏篇遂為稱善射東
堂之策雖詔墨未乾校中書之文而徵書可待其為欣
頌難盡名言

回平江守蔣待制先狀

伏審某官剖符南服獨惟蘓州刺史之賢持橐內朝亟
躋甘泉法從之列方郵寄傳命之始寔卿枌瞻望之華
碩敢後于鳧趨將俯申于燕賀第深喜抃莫罄言宣

回提舉謝少卿啟

入司帝籍蚤觀卿月之升出按藩條又快使星之睹踈
百城之風采馭六轡之光華恭惟某官文作古作者之
風名出見大人之右肅持使節誕布王靈攬澄清之轡
而澄清之路一空披紅腐之票而雀鼠之輩幾盡平頌
賦政直持宣威已乞外庸即膺大任某逖聞新命倍激
歡悰方脩贄見之恭亟拜函書之辱門雀在望固無千
里命賀之遙河葦可航庶有一日分光之幸

賀莫守郎中啟

雅志倦遊久厭承明之直上恩佚老遂分刺史之符恭
惟某官德配先民材稱循吏握蘭華省共歎卽潛剖竹
名城徒得君重除書甫下輿誦歡騰千騎班春坐愒棠
郊之蔭一廛受地方修梓里之恭

回江陰運使趙學士啟

名聲籍甚何止百聞文義卓然遂快一睹眷褒揚之非
擬顧哀陋以無堪恭惟某官理窟洞天人精浸之文詞
鋒出筆墨畦徑之外擊尊歡呼自中宮商落楮從橫盡

成黼黻何言誤聽遠隆珍投破千金以屠龍久懷竒而未試挽六鈞而射鼠知利用之甚難深古錦而一窺撫朱絃而三歎攘支離之臂自喜爭先盡渾沌之眉空暫借重

回武進馮宰到任啟

海寓共推嗟來莫矣里門初下喜聽蛩然念耳熟于百聞會意求于一睹不可尚矣坐上客儻真是乎又何疑焉名下士益不虛爾恭惟某官朝野著士名之望鄉

閭擅人物之評納萬頃于雲夢胸破大觚于霹靂手方
校官于巖邑已加惠于陳人首隆函書重紆衡蓋琢奇
句于月脇天心之上駕衆說于金口木舌之中遠追二
嗟之音高儷九成之奏周章拜貺衰朽增華函牛之鼎
烹雞固已垂于用大炤乘之珠彈雀空自抵于暗投頌
詠之私占言難盡

回梁倅到任啟

津亭弭幟首紆衡蓋之臨記室占詞又拜函書之辱謙

光委照朽質增華恭惟某官鳴珂里故相之家通德門
大儒之胄收槐坐之劍履而具存祖烈傳鳳池之毛骨
而綽有父風見謂佳公子之賢暫分半刺史之重未展
西極追風之足尚淹南冥擊水之圖題別駕之輿方資
于共理持從臣之橐行副于詳延馳頌之私占言難盡

賀葉守到任啟

縉雲故地昔真仙冠劍之藏金斗名城今天子股肱之
郡建雄殿東藩之屏通殊鄰地道之輶方疇咨選慎之

艱一寔麾鎮臨之始恭惟某官名重文章之選才高政
事之科操龍伯之釣而六鰲連奏神屠之刀而萬牛解
蕭望之補外姑歷試于百為汲長孺居中佇流榮于三
接某風舊矣試芘云初自惟殘年衰病之餘况復末路
湮淪之久距一舍之阻尚未恥金玉之音仰二天之臨
已大慰雲霓之望

回郭守到任啟

懸車久矣聽履蚩然擁篲膝行固盍展棠郊之謁衝書

金史卷之八十四
卷十四
贊見又當修梓里之恭衰晚卧疴推鈍廢禮第聞親政
共激懽宗恭惟某官循良慈惠之師碩大光明之傑學
稽古誼識洞天先解絃豈膠柱之調奏刀有破竹之易
惟凋郡百孔千瘡呻吟之後亦下田十年九潦饑饉之
餘所恃仁賢揚一扇穆如春之風庶疲癯被五袴燠若冬
之日方裁慶牘已墜珍函三過讀而增衰病之華十襲
藏而益巾箱之富已動千里共戴蘓刺史天尚有一廛
更為李將軍地

回陳倅到任啟

負未歸田有愧上床之間臨門墜刺竊欣下榻之迎故
嘗耳熟于百聞今幸目成于一盼恭惟某官太邱盛德
之裔崇寧遺直之家擅海內之名驚坐中之客自任天下
之志衆推分社之均褒崇黼黻之章光寵賁衡茅之
陋雖非朱陳昏姻之故素交元方兄弟之賢不謂投老
殘年衰病之身復覩角立特出譽髦之士故結門外之
轍已諧求友之聲賦井眉之瓶庶獲賞音之遇

賀劉守到任啟

辭榮禁路歸老窮閭望長者下風雖未諧一日登龍之
願陪先公高躅嘗叨綴三朝從橐之聯多難深零流年
晚晚柳儀曹之先友今有幾唐正元之朝士已無多豈謂
死生契闊于三十年之際復見老成典刑于二千石之
重恭惟某官抗高明而絕塵矚若刺盤錯而游刃恢然
分北顧宵旰之憂把一麾而去國付南渡保釐之托擁
千騎以臨州共興來暮之謠咸快爭先之睹自惟悼髦

之年車盡弗泊于駮奔庶幾宿昔之契未忘俯深于燕
賀

鴻慶居士集卷十四

欽定四庫全書

鴻慶居士集卷十五

宋 孫覲 撰

啟

回王倅賀冬啟

望金谷之塵固非一日僂少麻之壁亦復累年莫伸與
梓之恭奚道負荆之咎茲益伏遇某官情高皦日義薄
層雲悵墜觀之空已同棄物軫遺簪之舊終不忘情屬

君子之踐長悼孤生之永已千鈞借重俾蟠木為先遊
之資一語吠生謂死灰有復然之理其為欣忭莫究名
言

二

圭景迎長珠星紀瑞推筭啟千齡之運拔茅連衆彙之
興恭惟某官儒學發身三冬足用靖恭介福七日朋來
茂對休辰寵綏故友加惠桑榆之晚甫憐鐘漏之餘文
摘白雪之詞韻中黃鍾之律幽懷破散穆如負日之溫

病目驚窺絢若瞻雲之爛莫馳慶謁第激歡悰

回趙倅賀冬啟

老將及耄不知歲月之遷性不便書莫致寒溫之間屬
時君子膺彙征之吉但有野人分芹獻之心茲蓋伏遇
某官利器沉潛聲章炳煥晞髮扶桑之日本自于天
來濯足滄浪之淵尚從于地控屈臨邦屏分布郡條眷
言一人之餘光奔五雲之妙誦言穆若殆仁風揚紈扇
之間玉色鵠如正落月滿屋梁之上

回平江趙倅賀冬啟

璿璣觀象仰占星昴之中鍾律導和俯驗泉萌之動順
履一陽之復茂膺五福之綏恭惟某官喬嶽儲靈猗蘭
毓秀鬱鬱五雲之氣盡隆準之子孫落落萬人之英豈
重瞳之苗裔義文盡泰天統乘乾出逢熙洽之辰坐擁
鴻龐之祉敢圖眷獎尚軫哀遲來日無多猶仗一戈之
欲溺灰欲死詎堪六琯之吹

回兩倅賀冬啟

星東壁而昏中日北陸而短至屬方羣陰作沴之始已
兆三陽交泰之期恭惟某官心平而行高才全而德巨
鳴中律呂自可吹生燕谷之中語帶烟雲固應紀瑞魯
臺之上齋心踧誦稽首拜嘉穆如抱水有挾纊之溫恍
若覆盆委分光之照其為欣幸莫究名言

回強守賀冬啟

土圭測景鍾律均聲義爻占七日之亨漢歷表三辰之
瑞恭惟某官游夏淵源之學龔黃慈惠之師具萬善而

齋百神訶護順一元而復五福朋來燕寢凝香鈴齋坐
肅頌憐哀謝申祝誦言迎愛日之長已踐化人之國快
景星之覩遂窺刺史之天

二

雲師書物日御迎長以迓元氣遂正律本恭惟某官學
王者之書值聖人之時謝吏部之文章二百年無此作
矣李將軍之才氣萬戶侯豈足道哉逮茲淮陽郡
理之秋宣室受釐之對鳳鳴十二坐迎交泰之期鵬擊

三千函觀遠大之業

回莊守賀冬啟

六琯吹葭嶰簫應律五文刺繡圭景迎長恭惟某官履
七日之休辰陪千齡之典運分符共理蚤䟽三接之榮
拔如同升坐擁朋來之福眷言哀謝首被顧存委大旣
于窮途抒高情于麗藻黜如逃谷共分一日之光迫若
觀臺獨現五雲之體

回吳守賀冬啟

魯臺之望占祥懈谷之鳴應律雖三尺之冰厚繫衆陰
凝沍之時而一寸之暉長寔萬寶欣榮之始恭惟某官挺
生者哲出應昌期萬室連甍擁袴襦而詠千畦接軫賣
劍刀而耕諸縣豐登四郊清謐泰壇展窠方迎天地之
休宣室頒釐行奉鬼神之對

回錢守賀冬啟

天正著統陽德離潛黃宮調六氣之元清臺表三辰之
瑞恭惟某官學惟古訓道與時行盛大光明接千齡之

熙旦竒龐福艾擁百順之鴻休方應共理之求已促追
鋒之名感十陰而惜日喜添綵線之長待甘雨以為霖
行被袞衣之拜

二

六琯鳳鳴奏伶倫之律五星珠貫符太史之占一德撫
辰羣公受祉恭惟某官進非師錫出為時須秀鍾河嶽
之靈氣塞堪輿之大賢如趙成季熙熙冬日之溫文似
張水曹藹藹春雲之態時乘風大順履龐洪千騎森然

方擁馮熊之貴一翁耄矣空賀燕懷之私

三

衡古灰仰琯候葭飛衆士上行百神來燕恭惟某官名
高哲艾文擅詞宗見王千里而來獨出漢諸臣之右舉
古一人而已孰謂魯真儒之多親值聖時具膺吉祿蔭
堯雲之潤寧煩臺提之占瞻舜日之華奚俟土圭之測

四

六氣宣和八風順序聖人觀象見天地之心君子安身

待陰陽之定恭惟某官道增而日損德進而時行綸閣
紬書紅藥應五范之妙斗城問俗彤檐煥三組之榮屬陽
德之離潛宜陰靈之薦祉方興未艾與日俱長俾壽而
昌逢辰茲始莫申慶謁但極歡悰

回江陰趙守賀冬啟

心灰已久不復競辰曝背欣然未忘愛日忽墜緜袍之
信有踰袞服之華恭惟某官建牙當七十城剖竹猶二
千石儲休帝籍挺秀儒林玉具高挂願真江山風月之

主金印大繫肘寔岩廊柱石之姿履華旦之休明悼窮
交之獲落剖雙魚之尺素空慙強食之言分九醞之霞
觴應笑獨醒之陋

回王倅賀冬啟

帷宮瞻紫燎之升緹室候泉萌之動煒燁離明之旦龐
鴻鮮雨之恩恭惟某官出逢君子之時夙蘊大賢之業
密庸原闕千里仰成分布寬成一堂坐嘯履茲陽復茂
擁神休宣室受釐行促追鋒之召窮閭埽軌空懷賀履

之私

回晉陵黃令賀冬啟

日行北陸之次兆羣陰德退之祥星占東壁之中繫盛
德光亨之始恭惟某官袖牛刀之手安鸞棘之栖履茲
陽復之辰茂介朋來之福吹溺灰于欲死溉病木于垂
枯豈復小民惟祈寒之怨有同野老負愛日之暄感頌
之私占言難盡

二

柴壇之燎升方承大祭黃鍾之氣應以召太和恭惟某
官重學三餘逢辰一旦雖後凋之操不改于炎涼而拔
茹之速自同于消長茲陽復宜與時亨當為傳說之
霖起副蒼生之望猶有趙哀之日空遺故友之思

三

斗柄北旋陰凝而涸日車南指陽復而升恭惟某官秉
心有執德之堅適變得隨時之義自臨鄉縣衆謂賢公
已應虞書三老之文更遇義爻七日之吉全和氏之璧

而去何喜如之彈貢父之冠而來自今以始

回沈倅賀冬啟

候一寸之陰占四分之厯寔陽德離潛之始繫天心顯
俊之初恭惟某官德日進而又新福川增而方至豫州
半刺史索高國士之風魯國一真儒宜冠廷臣之右逢
辰休顯錫羨鴻龐鳴玉趨紫宸之朝寧有騷人之感擊
鐘應黃宮之律佇觀君子之亨

回鎮江劉都統賀冬啟

時乘玄駱氣兆黃宮占昏旦以候軫壁之中謹蓋藏以待陰陽之定恭惟某官得一編書于神所授出大奇計而世莫聞控帶二江猶傳鐵甕折衝千里是一金城履茲陽復之辰宜介朋來之福追鋒亟去行超三衛之雄授鉞重來更總十連之重

二

一德時升繫上將逢辰之始三徵氣運宜百神薦祉之多恭惟某官威名攝鳥鼠之戎圖書冠麒麟之閣一戈

却日天地與之低昂萬馬追風山岳為之頽仆履茲陽
復生擁神休望金谷之塵遙想盍簪之盛卧漳濱之疾
莫伸賀履之私

三

嶰竹十二筩以製律本而鐘聲出應土圭五十尺以求
地中而綿景迎長恭惟某官握虎豹之韜搃貔貅之旅
跨追風之驟超日窟以窮探乘問漢之槎枕天河而一
洗逢辰休顯受祉鴻龐占魯臺之雲坐見葱葱之氣望

長安之日行瞻穆穆之容欣頌之私敷宣莫罄

四

肇一氣之元正八風之序日居木上逮休復之祥雷藏
地中寔奮預之始恭惟某官山西將種代北人豪三令
之行凜如負雪之嚴一怒之威赫若迅雷之震勤勞百
戰感會千齡方剛德之浸亨宜龐禧之攸降出分帥閫
秉大將鈇鉞之權歸護殿岩正祈父爪牙之命

五

擊金鐘而効氣定五日之中比玉琯以考聲正八風之
序恭惟某官尊俎厭未付之難鼎鐘鳴不賞之勲當大
人繼照之明應君子彙征之吉帝寬憂顧神敢靖恭受
祉未可量逢辰自今始聞鼓聲而思將帥佇觀祈父之
歸羞蘋藻之薦王公聊致野人之獻

六

太初更漢歷之元招搖紀夏正之月道隨剛長福與時
升恭惟某官四岳藩翰之臣萬夫貔虎之帥聲名震夷

夏忠義賞神明方陽一氣運之初寔衆正上行之日六
蠱啟重候之賞已登將閩之崇九芝塗細禮之書行踐
樞庭之拜未遑慶謁但激懼悰

七

晝參日表夜考星中八能之士板書已奏五音二重之
室緹縵以候一氣恭惟某官生孟陬庚寅之日應上元
甲子之辰迎連珠合璧之祥擁錫盾瑠戈之貴名叅柱石
功載旂常魁然北斗之豪久總便藩之重踐此日南之

慶並趨帝席之前

八

距門牆不能百里遣旌祭亦復累年忽驚紀律之新又
見陽明之復恭惟某官受天大任秉國中權入扈殿岩
擁漢將南北軍之衆出總戎索陳楚師左右廣之容逢
寢昌寢熾之辰介時萬時億之祉望青油之幕想見元戎壽
筆之飛述銀筆之辭聊効野人食芹之薦

九

黃宮之氣應方調嶰竹之音紫壇之燎升首被寥蕭之
澤恭惟某官浩浩稟堪輿之氣英英鍾河嶽之靈會天
子躬三歲一郊之儀而上將擁七月朋來之福端闡發
號宣室頌釐鴻名增帥閭之崇細札奉璽書之寵自笑
瓠瓜之繫莫預榮觀但有野芹之甘欲分貴獻

回梁守賀冬啟

五勝相乘三徵始著聲見陽明之復用符剛德之亨恭
惟某官道術通明器資淵博兼文學政事之選蓋聖人

之徒與為循良慈惠之師繫大夫之賢者逢辰茲始處
顯宜先泳年光如化國之長寧須測景攜墨妙有郇公
之體奚俟占雲輿頌所同空言難盡

回無錫馮宰賀冬啟

一氣默運泉萌動而陽升諸福朋來茅茹連而彙進恭
惟某官靖共居位愷悌宜民雉出桑間已著仁賢之治
弦鳴堂上更牧清靜之功剛德寢亨藩釐紹至撫一雷
之土共觀鳥鵲之飛履七日之辰佇見龍梭之起

回莫守賀冬啟

星圖表瑞占五緯而睹珠連律本均聲製六琯而聆鳳
吹恭惟某官一朝人傑百世吏師華省望郎斗城良牧
暫輟邃嚴之直來蘓凋瘵之餘化國舒長逢辰茲始魯
侯燕喜受祉難量自嗟匏繫之生莫預觴行之列其為
欣頌曷究名言

二

漢歷授時紀上元之次義經畫卦為來復之初恭惟某

官經濟之才將膺帝賚中和之政自與天通梅載華如
紺碧而發于暮春露荐降如甘飴而零于午夜嘉禾合
穎瑞麥兩岐屬當七日之休辰通契千零之興運以天
公降祥之屢奚俟占雲而使君報政之成行當就日其
為欣頌難盡名言

與鎮江劉都統賀冬啟

吹比竹而音諧布重緹而氣應三徵著象五緯宣光恭
惟某官萬斛巨川之舟千雉大邦之屏手揮羽扇舟中

敵國何有哉坐擁戎旃席上過師乃如此履休明之盛
旦介憶萬之龐禧疇衛社之勲行布白麻之號享銷兵
之福遂臻黃髮之期欣頌之私占言難盡

與梁倅賀冬啟

吹比竹而音諧縵重緹而氣應三徵著象五緯宣光恭
惟某官一門萬石之家四室五公之胄印金斗大珥玉
蟬聯累朝閱閱之華奕世衣冠之望來展赤驥追鳳之
足尚淹紫鸞止棘之棲屬天公籲俊之初屆陽德離潛

之慶于時測景方加刺繡之長遂將披雲大慰傾葵之
望其為欣頌莫罄敷宣

荅葉賀冬啟

調六律之音天統冠三正之首辨九章之序羲文占七
日之祥恭惟某官稟間氣而生應昌期而出刺史之天
大奚煩補石之工化國之日長自笑却戈之陋仰睇魯
臺雲物之瑞實應商岩霖雨之求一陽進而道與時行
衆正興而福祿類至書室應圖而龍見行綴甘泉法從

之聯尚方賜履而鳧飛已著方丈真仙之藉共為瞻頌
難盡名言

回郭守賀冬啟


三正冠天統之元七日驗陽明之復龍離潛而現實大
人繼照之初鳳覽輝而翔應君子彙征之吉恭惟某官
德由日進道與時行倬彼雲漢之章爰告魯臺之慶薰
然慈仁之德聿茲周翰之良歲美人和政平訟息盍奉
追鋒之始亟歸調鼎之司人望既孚師言惟允某屬有

魚菽之祭于先人敝廬之下莫申燕省之賀于使君燕
寢之前第膺擊壤之謠聊効食芹之獻

二

一氣旋宮八風協序三徵始著百順皆來恭惟某官挺
松柏歲寒之姿鍾河嶽英靈之氣行藏體聖人之道顯
晦得君子之時當飛龍利見之初應拔茹彙征之吉天
衢聽履追祥鵬九萬里之程燕寢傳觴慶蟠桃三千年之

會



鴻慶居士集卷十五

欽定四庫全書

集部

鴻慶居士集卷十六
九至

詳校官石中允臣薩敏

主事臣呂雲棟覆勘

總校官降調編修臣倉聖脈

校對官編修臣徐立綱

謄錄監生臣方維翰

欽定四庫全書

鴻慶居士集卷十六

宋 孫覲 撰

啟

回王倅賀正啟

桑田蕪漫忽揚東海之塵蒲柳衰殘已迫西山之景壯
心空在來日幾何履茲潛陽出治之辰舉有除書布新
之喜恭惟某官乘時顯晦玩世徜徉歌生民嗣歲之興

應大有自天之吉朋簪四合風流栢葉之觴句法一傳
妙絕椒花之頌每興懷于故友久編籍于遺氓速墜函
封增光莫齒雍容坐上那聞櫪馬之鳴骭離門旁自笑
桃符之換

二

椒盤嗣歲儺鼓送寒茲惟萬寶趨新之時獨見故人求
舊之意恭惟某官秉心直諒蓄德輝光儒雅吏師風流
別駕日行黃道盍趨鵷鷺之行風振紫山高琢鸞花之

句恭承嘉惠重以好辭賦谷風之三章慶陽春之一曲
欲回殘槁復被青黃老病摧頽莫預董秦之奉悲歌慷
慨空傳武宗之詩感愧交懷占言難盡

回向倅賀正啟

四序更端二儀交泰接千載題期之盛宜羣公受祉之
多恭惟某官明哲保躬儒雅飾吏順履天正之吉密迎
神貺之休椒頌傳聲莫預一觴之薦鋒車趣召佇觀三
節之趨

回張倅賀正啟

天德更端人正肇序清臺課上元之歷方呈珠璧之祥
絳人推甲子之年遂軫泥塗之辱伏遇某官高文起廢
妙語噓枯大聲追木鐸之音絕唱儷陽春之曲屬介頌
椒之慶載賡伐木之詩眷茲哀朽之餘被以青黃之飾
高懷落落曲敦耐久之情老語諄諄但有流年之感

回平江趙倅賀正啟

日薄西山已迫桑榆之晚眷回北斗又觀椒栢之新茲

蓋伏遇某官德厚鎮浮道直矯枉惟下里炎涼之態每
形於令尹三仕三已之間而故交久要之情獨見於翟公
一死一生之後敢圖哀蕭猶被顧存垂褒華袞之章加
賁綈袍之舊老冉冉而將至空驚嗣歲之興物欣欣而
向榮已被春先之暖

回強守賀正啟

太史書元上經撰泰三朝謹始萬寶趨新恭惟某官魯
國真儒漢京循吏特達李將軍之勇一諾可重于千金

好絕張公子之詩百金固輕於萬戶蓋聲氣相求于一道故升沉靡間于殊途殆茲歲序之更獨見人求之舊賦椒盤之頌莫瞻列炬之光分棠樹之陰亦預春班之

澤

回莊守賀正啟

五勝代興既周必復一元更始以故為新賢德所臨春祺攸介恭惟某官碩大光明之傑循良慈惠之師二千石班春占土牛而得歲五百年住世摩銅狄以興嗟加以履

運中興逢辰交泰一城嘉色欣欣上旄羽之塵四野春
聲藉藉動袴襦之詠其為占頌難盡名言

回趙倅賀正啟

暮景飛騰自遂桑榆之暖風光流轉又驚椒栢之新暑
新桃以禦不祥批檣壤以求如願未能免俗且復效顰
伏遇某官順履昌期寵綏故友一言起廢奮百蟄于坯
土之中老物增華茁九芝于枯槎之上

回汪倅賀正啟

蓋茆容膝面壁觀心不知晦朔之遷但覺暄寒之異圖
鬱壘之象莫驅五鬼之窮進屠酥之杯豈恨一翁之後
茲益伏遇某官收憐衆棄矯拂羣庸方當嗣歲趨新之
時獨見懷人求舊之意疾風拔木勁草之立巋然烈火
流金韞積之藏自若重遺緘翰中貺頌言蒲柳餘齡方
受闕之託瓊瑰妙語空留十襲之藏

回錢賀正啟

頽齡餘幾見謂陳人端月載臨尚修故事門符執厲方

懷鬱壘之求齊釀先春遂辭臺駘之崇恭惟某官威風
惠氣舒慘一方大冊鴻文斧藻萬物著槿帽而撾羯鼓
桃杏驚開叩羽弦以召黃鐘川池凝涸肇履三正之吉
大均千里之釐固舒從公共分一日况復如我獨有二
天莫副願言但深欣頌

二

四序密移物無終否三微浸大福有朋來恭惟某官躬
成明之姿撫休嘉之運九歌由勸每懷天保報上之心

衆正彙興共享既醉六平之福逢辰茲始稱壽宜先自
憐幽屏之餘莫預駿奔之數獨無高論進輸投蓋之忠
尚有寸誠堪賦頌椒之什其為欣誦莫盡名言

三

夏時御正周歷更端首三統以承乾文二儀而盡泰恭
惟某官介藩均佚秘殿紬書順履三朝親逢一旦日月
十二會已符榮宮之占春秋八千年宜介大椿之壽方
修慶牘遽墜嘉音雖涸轍垂枯久後卧龍之起而孤根

欲朽空觀萬木之春

回江陰趙守賀正啟

門垂葦索盤頌椒蕃星回斗野之杓春入練江之色恭
惟某官才高帝胄名著吏師與庶民共楚臺之風得賢
者樂齊宮之雪道載土牛之出遙知卿月之臨門聞樾
馬之喧空想德星之聚方納履新之慶尤深懷舊之私
黃絹占詞白衣載酒渴心不轉莫預西園飛蓋之遊食
指可占詎有北海空尊之嘆其為欣頌莫究名言

回晉陵黃令賀正啟

周星既復端月初臨核桃梗以厭天節土牛行以戒農
事恭惟某官獨高政事之選衆推慈惠之師治千乘之
賦而辨多多勗百吏之課而書上上愛履三朝之吉茂
迎百順之嘉藉藉郡氓唯懼瓜時之及諄諄一老空懷
芹獻之心

回沈守賀正啟

銅渾觀象歲籥代終玉燭宣和春元茲始恭惟某官躬

行古道心存端方比上聖解紘更化之初應君子連茹彙
征之吉逢辰有俶錫美惟休儻耕省耜盡致九推之助
脂車入覲更䟽三接之榮

回周守賀正啟

魯經書五始之元漢儀紀三朝之會繫萬寶化生之日
兆羣賢彙進之祥恭惟某官哲謀肅乂之才正直端拱
之德親逢聖旦方興見晚之嗟節順王春宜介朋來
之祉自憐老去寔聳遐瞻干指蒙休竊比棠陰之舍一

觴獻壽莫持椒頌之盤

回平江胡司法賀正啟

璿璣驗中星之見以紀王正象魏布端月之和以前民
用恭惟某官識洞陰陽之蘊氣凝天地之中妙語春容
暖于布帛大篇舒卷燦若烟雲造臨元吉之辰宜集善
祥之慶重勤大貺遠隆嘉音問與人之紀年敢冒復陶
之寵賦阿戎之守歲空驚暮景之斜

回鎮江劉都統賀正啟

四序平分歲星更始三陽彙進卿月高升恭惟某官門
第山西之豪時望斗南之傑磊落掀天地一九泥可封
百二之關叱咤生風雲半段鎗可破十萬之衆爰介春
祺之慶猥先故物之求緹騎鼎來函書拜辱渴心不展
空懷賀厦之私輿論可占行有築壇之拜但深欣頌莫
究名言

二

炎正嗣興接千齡之統王春肇序登四海之圖惟時百

戰之多宜受朋來之祉恭惟某官鞭笞犬羊之衆號漢
飛將軍駕馭貔貅之師為唐大都督名書鍾鼎勳載旂
常逮茲熙旦之期益茂春祺之介倚爪牙之衛久外總
于師干咨帷幄之籌盍坐圖于廟勝其為欣頌莫究名
言

三

歲律嗣興陽明景進山無紀歷旦驚寒暑之更容有疑
年重起泥塗之歎恭惟某官高情奈久偉量鎮浮長鳴

司風雨之晨特操厲冰霜之節愛履三正之吉方取新
厭故之時獨占一紙之書皆悼屈傷屯之意拜嘉甚寵
懷惠靡忘肅肅初筵莫賦椒聲之頌區區微贄但分片
獻之甘欣慶之私占言難盡

四

周星既復端月嗣興一元資萬彙之生諸福會三朝之
慶恭惟某官竒龐福艾碩大光明謀初百中而妙若穿
揚善後萬全而勢如破竹履端茲始錫羨有初建大將

軍之旄行占郭令中書之考聽與人之頌盡歌魯侯三
壽之詩瞻頌之私敷宣罔罄

五

藏冰北陸四序歸餘迎氣東郊一元更始恭惟某官執
干扈殿崑之峻建牙分戎閩之雄千載逢辰三朝受祉
桃弧棘矢山林無魑魅之逢栢葉椒花壑谷有吾公之
樂眷言幽屏遠墜珍投原田每每敢有圖新之願締袍
戀戀空懷求舊之私瞻頌之懷敷陳莫罄

六

履三朝之會方占參尾之中登四海之圖今在斗牛之
次有開令序允屬休辰恭惟某官肇履春元密膺帝賚
總戎旃之重有嚴帥閫之雄聯韶冕之華宜視公槐之貴
名借日起道與時亨壽福而藏行致百朋之錫老衷而
耄又經一歲之時

七

治歷以觀天象式序三辰作經以謹王正益尊一統恭

惟某官器深而博行直而方六竒淵秘感鬼神一節英
明貫金石三微紀月欣穀旦之親逢四德體元宜春祺
之協應爰擁師干之重久資戎翰之良疇敵愾之勲已
紀雲臺之象總嚴凝之護行資武帳之籌

八

星紀初回春祺紹至三陽朋進一德上行恭惟某官沉
雄宏毅之姿竒龐福艾之相奮空卷而扼虎亢絕藝以
屠龍入護中宸作朕心膂出膺外閫為國介牙履茲潛

陽出滯之辰宜介小往大來之吉元戎十乘可擬金城
百雉之崇袞服九章行應台躔六符之象

九

玉歷頌正象魏布法千歲之日于此求端一旦之逢自
今作始恭惟某官盛德介百福之祉勞謙忘千乘之尊
悼故老之遺已迫桑榆之晚暮納履新之慶宜同草木
之欣榮踞誦拜嘉占詞叙感明月空塵于大旻陽春莫
儷于好音欣頌之私占言難盡

回無錫馮宰賀正啟

魯經表首事之年漢儀紀朝正之月木行履運金奏宣
時恭惟某官齒德為老成人愷悌為風化首親逢熙旦
坐擁龐禧更桃符于兩戶之間所閱多矣飲屠酥于衆
稚之後而壽莫量焉重勤一騎之臨函拜朋來之辱
嘉言慰藉溫然如勞酒之醺老語真醇叢爾真祭魚之
獻

回莫守賀正啟

考音聲而太簇鳴候昏旦而中星見羣剛浸長諸福朋
來恭惟某官道大而時升德成而日進耆艾省臺之望
風流藩翰之良桃梗効靈藹千門之佳氣土牛占歲喧
四野之春聲凡附託于一塵舉涵濡於九里遠馳緹綺
辱貺函書椒盤頌花雖莫預阿戎之集屠蘇送暖豈復
憂范叔之寒欣頌之私占言難盡

回宜興陳宰賀正啟

北斗回杓歲星始見東郊載耒農扈符興恭惟某官愷

悌宜民忠嘉許國未展雲霄之步先安枳棘之栖進服
邇僚師言惟亢親逢熙旦賢路方開盍紆畫繡以疏三
接之榮更為春酒以介千齡之盛其為欣頌莫喻名言

與莫守賀正啟

禘符逐厲俄驚一歲之除椒頌薦聲共慶三朝之會恭
惟某官王佐之學當陪國論承流之寄尚布藩條寅奉
夏時肆頒堯歷進牛鞭而占歲僥熊軋以班春咸欣欣
聞鼓樂之音舉熙熙有登臺之樂東閣之梅紀瑞以開

故歲之花南國之棠文陰留誦他年之愛

與鎮江劉都統賀正啟

一氣不頓進念交泰之難逢四序本平分慶履端之有
倣恭惟某官戰勲出諸將帥之右賀畧得古兵家之流
空萬竈之烟已徹秋防之驚按諸營之柳佇瞻春事之
新迨茲穀旦之臨宜奉椒觴之薦柴門寂寂正服老農
夫抱甕之勞幕府潭潭但想大賓客盍簪之盛

回葉守賀正啟

舜璣占七政之齊繫上聖撫辰之盛漢儀講三朝之會
寔羣公受祉之初恭惟某官式古訓以緹身奉天時而
布法束縛羣奸如東濕恢恢無漏網者養護小民如養
雛洋洋其得所哉迨茲三陽交泰之初舉有一視同仁
之喜斗回寅柄方行太守之春椒頌辛盤聊效野人之
獻其為欣頌莫罄名言

回郭守賀正啟

天王居正建大號以表年方伯承流履春元而受祉羣

陰消伏萬寶欣榮恭惟某官鍾五百年間氣之英分二
千石名城之寄輿情樂只遙頌藹然屬剛德之浸亨宜
春祺之攸介逢車追召已塗芝檢之書荷橐聯榮行奉
綸緯之直

二

盤誦椒花門書桃梗排羣陰于九地集大慶于三朝恭
惟某官凭熊軾而應木行之辰進牛鞭以驗金穰之慶
掃遺蝗于積雪之下散驚鳥于列炬之中萬室安眠不

聞夜吠午門喜笑以作春聲布寬大之條以廣上恩發
中和之政以尊時令紆丈二之組已載觀嗣歲之欣奉
尺一之書行見履贊元之任

鴻慶居士集卷十六

欽定四庫全書

鴻慶居士集卷十七

宋 孫覲 撰

啟

復官謝沈相啟

上書北闕俯輸螻蟻之微情出紆西垣仰占乾坤之大
造繫浩浩垂精之感實惓惓造膝之成伏念某謀身養
而愚受性拙而褊自知寡與見謂畸人卒蹈危機為世

大倖強弩射市非我獨也而薄命安所逃腐鼠中人了
無預焉而奇禍乃如此舉有竊鉄之態動成投杼之疑
固已不勝衆楚之咻豈料又生一秦之患遽興大獄首
寘嚴科輸之鬼薪論為城旦致之必死示以無還自惟
十九歲而羝之乳無期豈謂一千年而河之清可俟晉
馬已老矣空懷伏櫪之思吳牛尚喘焉猶軫駐車之問
茲蓋伏遇僕射相公堂堂社稷之鎮英英人物之宗開
闡大公主張善類凡預平反之筆皆為全人一歸造化

之壚舉無棄物出餘燼於溺灰之後援窮囚於擠壑之中
驚膠續絃可補黥劓金篦刮膜復睹清明所以示丞相
宰天下之平予以坐王居都城中之大滌除宿負伸
救沉寃收茲不齒之身寘之無過之地戴更生之大賜
亦何殊食馬之恩願垂盡之餘齡猶欲效搏螭之力

謝万侯相啟

夢得之謫九年嘗有大鈞之問屈平之放三載尚從太
卜之占况茲二紀流落之餘而有一旦遭逢之異伏念

某頃繇學者進二憲臺五號請和戎可紓他時倉卒非常之變以安國步一章論伏闕必啟異日羣小不肖之心以名亂階豈因為諛諛異論以冒刑誅姑欲效惓惓愚忠以裨廟算大臣按劍而怒彼遊魂之衆小醜何爲諸生舉幡而來謂中興之佐一變已足既大違於國是旋黜守於方州未幾邊塵再犯京闕生民罹塗炭之害中都萃蛇豕之妖靖康龍沙萬里之遷明受錢塘二凶之叛誰為首戎端坐自如獨有言狂衆愠猶在皇天悔禍

聖主厭兵始畫地請和戎之盟亦制辟徵伏闕之士不
辨嚴霜之早固知圖蔓之難某素不才過乃由此茲蓋伏
遇僕射相公三朝雋老一代名臣歷睹羣公朋黨讎復
之非馴致四郊戎馬長驅之禍餘風未殄巨蠹相乘踐
覆車之轍而弗疑抱救火之薪而益肆面謾君父蔑視
同僚方造膝論事而猜忌忽生已反眼為仇而兇怒不
測况於草芥踐踏何嫌重以雷霆糜滅可待側聞爰立
實慰具瞻始以尊君親上仁民愛物之心盡草茹賢疾

能惡直醜正之弊興衰故物加惠窮黎收之納溝必死
之中被以骨肉再生之造餘羊索矣稱効茫然班荆履
椒舉之亡固不渝於一諾結草亢杜回之役尚圖報于
九原

謝湯樞密啟

受一廛之地正窮閭待盡之時賜十行之書有賢路聯
華之寵大鈞埭北皆被陶鎔暮景衰殘足以榮耀竊以
孫叔敖去楚令尹而無憂色齊管仲奪伯氏之邑而無

怨言孰知古人喜懼哀樂之情豈謂得喪通窮之故某
文惟讒黜辱在泥塗盡褫官資降為皂隸偶不至弭耳
作纍纍之狀亦未嘗變色愠戚戚之窮公伯寮之愬季
孫其如命何臧氏子之沮魯侯不過天也數固必復事
有好還治道勃興羣賢彙進欣逢一旦感會千齡當軸
處中改弦更化上稽公論下合師言正路宏開羣情胥
悅若梅林之望以慰渴心如屠門之過固自快意更遇
執肉分珍之賜重叨投醪共飲之仁凡今日之所蒙在

孤生為最幸茲蓋伏遇知院樞密文章華國道德佐王
思天下飢溺而同其憂得英才教育而共其樂謂居上
翳民之休戚當挺身為國之安危故能簡上帝之心出
而任大臣之事永惟許國之義莫如得士之昌追錄故
臣半為異物祿介于弗及矣寧無恨焉封雍齒而先之
固有喜者

謝程參政啟

囊封奏御方虞冒犯之誅詔紱䟽恩更濫褒陞之典擢

從罪籍賀貴朝紳叨拜恩榮恍如夢寐伏念某有至愚
極陋之累無固身慮患之明名浮而挺災言狂而召怨
一夫誑楚讒挾謗書衆鬼謀曹遂成竒禍身名破滅僅
齒平生骨肉喪亡惟殘一老每追惟命蒲牛衣之泣空
悵望華亭鶴唳之聞偶餘息之尚存信此身之有待上
聖撫域中之大羣公宰天下之平魯一真儒覽輝而獨
下衛多君子拔茹以同升壞植散羣除苛解媯盡蠲密
網稍出羈囚夫何二紀禁錮之餘亦預一時甄收之數

茲蓋伏遇參政氣充剛大性極高明闢正路而有疾邪
距詖之功鎮頽波而厲激濁揚清之志謂柳士師之黜
豈一身寵辱之足云而阿大夫之烹實公道廢興之所
係出沈寃於無所告攄孤憤於不獲申蓋將使多士皆
歸心焉豈但令小夫獨受賜耳洪鈞所播纖芥無遺不
疑償同舍之金彼誠誤矣晏子解左駟之贖幸孰甚焉
大惠不貲空言難盡

賀張恭政啟

伏審崇獎者明進陪國論寵數絕羣臣之右歡言溢海
宇之間恭惟某官叅政學邃六經之醇名冠萬夫之表
文章雋老道德宗師太公遇西伯而來歸謝傳卧東山
而強起天下之義理所閱多矣民間之疾苦皆親見之
以茲開物成務之姿方當經體贊元之任得時而駕莫
如今日當仁不讓豈在他人四方聳岩石之瞻羣生佇
大鈞之佈何必埋輪道上奮一怒之快於豺狼自可借
箸食前折千里之衝於尊俎某漂流棄物哀槁餘生側

聆置輔之求倍切依仁之願爰念囚山之義固以蒙解
縱之恩尚未填壑之時猶及見經綸之盛

謝陳樞密啟

身老百罹久安窮陋恩推三宥俾解拘維驟起民門載
通史籍伏念某漂流嶺嶠歸宿田廬乞火於南隣北里
之中拾穗於東阡西陌之上醉尉訶怒窮鬼椰榆臥聽
虞虬桑婦之歌起扣歎乃漁翁之唱年逾八秩星度兩
周餘息猶存榮望已絕肆潭茂渥開八餘黎訪千樹桃

而苔生種一頃豆而其落五雞二母嶷已編渤海之氓
三鍾十束薪尚賦支離之祿恭惟樞密文高和寡才大
用難雁塔書名極天下掄魁之選鰲扉視草冠中朝供
奉之班首膺夢卜之求分總樞機之要魏乎社稷之衛
熒然邦家之光將相安危之寄方隆朝廷人物之評所
係一言印可衆論景從致茲衰屏之蹤遂玷明揚之列
雖大人行大公之道不以為恩而小人懷小己之私詎
忘其報

謝韓尚書啟

先哲王之制刑垂萬世不刊之典大司寇之議法哀一夫無告之辜仰繫善貸之仁慈謂難逢之會伏念某許身甚拙涉世尤踈自任一介不移之愚久處衆人必爭之地以和戎緩兵為是以伏闕首禍為非狂踈不切於事情迂濶動乖於時變滑稽玩世但思碌碌以全生骯髒倚門豈免栖栖而為佞卒罹大謗自抵嚴誅悵來日之無多悼孤生之已永誰復憐者被以三薰三沐之慈

遂一洗之出於大譴大呵之域茲蓋伏遇詳定判部尚
書以儒雅飭吏事以忠義結主知德大而矜愚器博而
容衆威名烜赫京兆之知養伏如神議論詳明尚書之
心持平若水草去折言皮律之弊輔成救焚拯溺之功
豈圖二紀禁錮之餘首玷一言平反之重自今知免矣
已逃芻蕘之誅抑過所望焉俄見廢陂之復窮途易感
沒齒難忘

謝中丞湯公啟

削丹書於秋官之籍繫聖天子獨斷之明齒清議於月
旦之評實卿大夫游談之重伏念某藐然一介蕞爾餘
生闕虫作心腹莫大之憂二豎為膏肓不治之疾固嘗
求福於木居士亦復祈巧於天女孫鬼神惡而天高不聞
蛟龍怒而淮深莫測歛如過隙星紀之揆两周悅若披
雲天日之光一睹仁言博矣王路坦然一燈借明九里
蒙潤補壞墻而翁怒自求非意之誣束緼火而婦還更
冒曲成之造茲蓋伏遇中丞剛大之氣充塞堪輿蹇諤

之聲動搖山岳靖共好直忠憤疾邪衰此窮途已同棄
物掀於淖而濯西江之水傅之羽而培北海之風骨鯁
在咽又從嗜噫腦脂去眼復見高明銘佩之私占言難
盡

謝周殿院啟

蚤罹讒慝俾從四罪之誅卒賜辨明復序兩甄之列伏
念某自惟孤拙屢致怨憎一啜南箕之成莫障西風之
汗窮途栖屑何止百罹暮齒侵尋唯欠一死屬君相明

良之合會聖賢馳騫之初抗議去讒疏恩起廢晉屈產
之乘已老復何為哉魯靈光之殿獨存殆非偶爾茲蓋
伏遇殿院忠憤慷慨剛德沉潛公論倚平國勢增重善
救無棄曲成不遺致茲流離放逐之餘亦被收拾哀憐
之數輪困老榦雖無意於雲霄呢喔長鳴尚不渝於風
雨

謝中書王舍人啟

衆毀盈庭陷以人臣之大慝一言投匭記以天下之至

公伏念某與人無茹肝涉血之仇而所遇有笞地射天之惡欺君指鹿怙衆噬羸合為一朋興其凶怒彼越俎者彈文本自於借秦遂下石焉制獄暴興而助桀鑽皮出羽洗垢索瘢雖云極鍛鍊之工終莫得毫毛之罪微笈忽生乎偃月疾威不掩於迅雷固自不知其所以然曷為至於若是極也忽三州之檄同日俱下合諸戎之卒持挺促行幼女牽衣老妻裹飯旁觀尚為之出涕在某固難以為心流落三年阻絕萬里旋蒙恩貸歸守故

邱一室蕭然物故幾盡老妻憂死幼女病亡藁葬空山
但餘兩塚寸心破碎老淚縱橫悵悵可憐奄奄欲盡方
羣小快一時之怒顧一夫之休戚何足言以四海望中
興之心而大臣之舉措乃如此第莫追於既往豈有俟
於將來不圖餘生復見今日大明傳照衆正上行噓枯
吹生朽株蒙潤起幽作慝蒞室垂光雖周黎民固以無
遺而絳老人於今獨在悉除過故復冒官禁茲蓋伏過
侍講中書舍人巖廊柱石之姿宗廟盤彝之器學通聖

域文擅詞宗首膺仄席之思入奉受釐之對論經秘殿
舌有風雷視草西垣筆參造化屬令小子叫闈之日驟
蒙明公援壑之仁自惟無褚公半面之新以何得季子
一諾之重廟堂之上緩頰游揚縉紳之間發憤慷慨謂
兩禁舊臣而降為皂隸以百年遺老而辱在泥塗掖起
編氓還畀吏籍凡此遭逢之異豈非宿昔之因大患不
貫空言莫叙昔也龜關固知寡不勝衆之難今而馬反
為駒亦有老而復壯之理窮途易感沒齒難忘

謝凌正言啟

謗焰有藝天之勢何負而獨遭漏泉無擇地之偏卒歸
於一洗繫卿大夫悼屈哀窮之助為愚不肖殘年投老
之光伏念某早觸禍機又嬰罪罟兩怒溢惡更謂盜邱
三尺深文謂為黥布固已悟昨非而自屏豈應頌故怨
以求申會上聖之作興當大賢之特起有騶有駟有驛
有駱一空冀野之羣非龍非螭非虎非羆出應涓濱之
卜拔茅彙進推轂相先善類攸歸國人所慕茲蓋伏遇

某官矜愚容衆汎愛親仁哀此陳人未編於鬼錄借之
餘論俾復於官聯未知論報之方但有循涯之愧破甑
固已歸瓦礫何所用之故車猶可備薪蒸未忍棄也

謝凌舍人啟

負罪投閒委孤根於枳棘遊談借重收暮景於桑榆竊
以聖人戒說讒驚朕師之憂君子有淫刑及善人之懼
雜造端之微膚受而流敝之極面謾羣鴛吠聲深文刺
骨讒人固不容矣卒自沈於江中酷吏抑又甚焉謂將

反於地下詩書所記古昔皆然某愚不知方動常違俗
早惟羅織之網久從縲紲之拘不自意全適有天幸銜
寃二紀便當飲恨於重泉起廢一朝可謂逢辰於千載
茲蓋伏遇給事舍人論事瑣闥有批勅之風珥筆殿坳
得記言之法仁惟兼濟義在曲成閤茲溝瀆之餘丐以
齒牙之論片言借寵末路增華出之下駟之中服在左
騷之列其為感悅難盡敷陳

謝尚書侍郎啟

除殘去暴共欣湯網之開洗垢滌瑕盡脫楚冠之繫伏
念某已非故我自謂陳人褫簪裳二紀之餘服犂鉏一
廛之地流年晚晚漏盡鐘鳴病骨支離帽寬帶落忽紆
宸綬加昇朝紳顧影可憐捫心自媿據鞍矍鑠固無著
鞭先路之心奮袖低昂但有擊缶歌田之意茲蓋伏遇
某官高情特達大節顯印悼木偶之漂流哀波臣之蕩
汨汗青蠅之思慨然有怒劍之揮割丹雘之盟行矣見
乘車之下

謝榮太守太監啟

窮愁自屏久安寂寞之濱慶賜初行亦預龐鴻之施伏
念某早居爭地卒踐畏途朝辭城南尺五之天夕貶潮
陽八千之路上蔡相君之憾空悲犬耳之黃江州司馬
之歸應待烏頭之白雷行奮地霧披盡天肆開祝網之
恩盡返西山之客茲蓋伏遇知府高情振薄大度矜愚
出名論於月旦之評哀感音於土風之操念泥塗之久
辱仁惟推較之先悼縲紲之非辜義有解驂之贖其為

感悅難盡敷陳

謝孟郡正啟

早嬰憲網遂階饕餮之凶忽奉恩綸復序神荼之列伏
念某杜門掃廕固已有年對食吹虀猶懼不免爰起夔
龍之輔盡投狼虎之讒雖天寬地大徒步自由而道盡
途窮來日無幾更叨恩宥復冒官榮搔鶴髮而彈貢禹
之冠褫龍具而束公西之帶宿心猶在時拄笏以看山
習氣不除尚脫巾而漉酒茲蓋伏遇少師判府信安王

三朝耆德一代臣宗人品極涇渭之分世論倚權衡之
信章子不孝而有孟軻之辨治長非罪亦由孔子之言
致茲縲紲之餘復被簪紳之寵循涯有覲詠德知歸念
枯稜沒藜藿之中偶然未死俾斥鷃翔蓬蒿之下遂得
此生

鴻慶居士集卷十七

欽定四庫全書

鴻慶居士集卷十八

宋 孫覲 撰

啟

復撰宮觀謝沈相啟

詔綽甫頒方除罪藉恩綸薦至復踐榮途不圖屏竄之
餘更濫褒加之典伏念某自投憲網遂褫朝紳未嘗望
絕塵一睹龍章鳳姿之表詎敢呈薄技少俾竹頭木屑

之功倦鵲空懷三匝之悲飢鴈猶有一呼之待仰止大
釣之播靡先蟠木之容自惟積累之難磨備罄忱辭而
上瀆畫墁而取食固自知其妄矣乞漿而得酒抑又過
所望焉茲蓋伏過僕射相公黼黻斯文藻飾萬物斟酌
元化舒慘四方開使功使過之科詔馭福馭威之柄眷
言孤迹久困窮途援之積垢汗蟻之中示以棄瑕錄用
之意廣內九闈之邃偶寓直其中真庭羣帝之祠亦且
員於此病駒而備刺史之駕老鶴而乘大夫之軒仰繫

從容之仁實負空餐之愧號咷井而出已踐初言合浮屠之尖更終大惠

謝万侯相啟

陞華書殿已冒隆名均佚神庭更尸厚祿鴻私所被感涕自零伏念某與世參差為官拓落碌碌無甚高之論斷斷惟自用之宜坎壈數竒連蹇三黜正如偃師造木偶耳始傳合丹漆於遊戲之間忽若工祝棄芻狗然已狼籍道途於蹂踐之後自驚變化之速僅存殘敗之餘

瀧吏譏訶亭尉嘲罵俛出勝下一笑之恥何足言推內
溝中九史之魂復誰弔茲蓋伏遇某官言合蒼龜而必
應行中準繩而不差念猷畝之餘生乃門墻之舊物早
接步武鮑叔牙獨知管仲之賢莫測崇深張延賞烏識
韋臯之貴雖屢慶再三之瀆而不替終始之恩秘殿高華
真祠優佚璽書絢爛印組光新驟驚清切嚴近之班併
為衰老疲瘥之罷息黥補劓固已盡於獻三捨舊圖新
尚有期於借一

謝張參政啟

奏牘冒聞仰干鴻造詔音報可曲遂私成伏念某早歲
狂踈未更變故晚途流落但欲偷安嘗膽訟愆咋指悔
過方懷直散羣之後雖徵投杼之機而臨深履薄之餘
猶是傷弓之翮大賢入輔聖主仰成四海沐寬大之恩
百神聽靖共之德飛章上達固無明珠按劍之疑賜札
俯頒遂復木瓜報瓊之重茲蓋伏遇參政禹功翊舜尹
德承湯悼簪履之遺而欲兼叔掩瑾瑜之瑕而不求備

得季子之諾殆過於百金墜劉公之書固賢於十部爰
逾布帛施等邱山通書殿之清班竊祠宮之厚餼併叨
異數衰老之光盡出洪鈞陶鎔之賜乘牛車以觀東閣
之士固所願焉空蕙帳以勒北山之移自今始矣

謝湯樞密啟

秘殿通聯叨恩不次真祠厚餼竊食無功自驚縲紲之
餘復冒旃幃之芘伏念某憑愚好勝任己直前適丁羣
仇彙進之初輔以寄詆深中之士徵妖聚鬼倡造無根

銷骨鑠金誣陷不測彼快一時之私怒可矣其如天下之公議謂何治道聿興皇明委照聖主議哀矜之典大臣推從恕之仁閔茲窮閻待盡之身收於散官永棄之地蓋謂拔十得五庶幾有獲焉夫何問一得三又過所望者茲蓋伏遇知院樞密以孤忠許國以斯道覺民簡在中宸典司密命眷孤迹湮淪之又會洪鈞化育之初欣逢千載之期首被一夫之澤通籍殿廡之邃置身宮館之間衰髮曷為叨逾至此洗心改事方將銘坐以圖

新鑄骨銜恩尚欲結纓而効死

謝陳樞密啟

直館就閒方上祈哀之請私庭望拜遽叨從欲之仁榮
躋嚴近之班併示使藩之寵省循非據喜懼交懷伏念
某坎壈一身漂零二紀志哀善變而未免徇苟蠅營之
態寢驚夢魔而尚虞風聲鶴唳之聞悼東嶠之失莫
追悵西崦之期欲盡殆茲晚遇有愧平生著籍殿中綉
書廣內進冒宗儒之列居叨先聖之祠地近秩清官閒

祿厚戶外屨滿已無爵可羅壁上梭飛而見蝎亦喜茲
蓋伏遇某官知院樞密材隆國棟望重民瞻早發迹於
掄魁晚疇庸於政路矜取故物辱在洪鈞矧茲耆及之
年尚玷褒陞之典三錫之榮過矣難忘大造之酬一飽
之腹果然空負素餐之恥

謝湯中丞啟

秘殿脩文濫綴朝紳之末真祠訪道更叨家食之恩迨
過所蒙蓋知所自竊以淮南憚汲黯之直寢稱兵之謀

回紇感郭令之誠下投戈之拜藜藿所以恃伏猛之威而不採山淵蓋亦蒙潛珍之潤而不枯故茲委照之餘皆在容光之內某蹉跎暮齒潦倒餘生大公之路一開褒復之恩存至伏遇中丞剛大之氣養之浩然奔逸之塵望之矜若聞風而貪懦之志立正容而讒慝之意消世道將興朝倫所持惟是鉗口結舌無告之狂不勝雖髓剝膚莫大之辜卒解免於深文尚叨塵於臚仕追尋已往既陳之迹疑蕉鹿之尚存獨有懷恩未報之身咏

梁鶴而自愧

謝周殿院啟

上祠宮之請亟推從欲之仁聯館殿之華更冒隆儒之
寵伏念某孤暗莫知衆喊難齊久行憂患之途重罹羅
織之枉命窮而出所向觸藩病定而思方食失筋兩踰
歲紀六遇郊裡獨卧窮閭永同棄物借齒牙之論寔有
望於至公悼縲紲之非遂卒歸於一洗茲蓋伏遇殿院
立朝之大節以正直聞致主之嘉謀以儒術用臺評一

出世論所宗長劍倚天而氛祲自消猛虎在山而草木
皆遂朝端屹若王路坦然致茲衰老無用之身亦預蒐
攬甄收之數牛溲馬勃倘自効於毫分鐵心石腸誓不
渝於燥濕

謝察院啟

囊封跪奏竊希琳瑯之間賜禮垂褒遂著金閨之籍某
竊謂誠身有道莫如勝己之私不由徑行而人伏其公
不鬼屋漏而神聽其直免胄而見盛服以朝故能動容

正色於衣冠瞻視之間自然厭難折衝於尊俎談笑之際恭維御史紀綱之地實為天子耳目之司不怒之威未言而信如伏山林之猛自全藜藿之生茲蓋伏遇察院高蹈不疑獨立何懼以中庸之行為設施之表以法語之言為議論之宗多士具依有蒙霧不知之潤一時處顯皆分燈無盡之光致茲幽屏之踪亦預明揚之列神龍高舉固已慰四海望雲之心斥鷃卑飛獨喜附一枝巢林之托

謝凌正言啟

抗言自列願追營香火之緣錫命過優俾接武圖書之地竊以毀常生於溢惡譽每出於過情坐虎觀而見蔡邕豈其然乎射木人而思蔣濟亦已甚矣某狂狷妄發出言而逢怒蠢愚自守獨事而懼尤怒遷而水之蟹可憎患至而江之糜弗悟讒夫峻詆酷吏窮探方一時摧殘蹂踐之餘僅夷於草莽豈二紀衰病流離之後有望於桑榆茲蓋伏遇正言持心如冰鑑之平稱物有權衡

之信察人於衆惡拔士於一言迨茲重老之年亦玷惟
新之令敢圖大惠更欲試春草之長獨有後凋尚有愧
霜松之老

謝中書王舍人啟

剡奏陳情誤恩疏寵名標帝所上廣寒修月之宮路入
神仙遊禦冠御風之圃遂僥一時之幸併叨三錫之榮
伏念某蠢迂而動成悔尤疇窮而少所諧偶自惟投閒
置散無所用心獨有挾冊讀書庶幾求志擁鼻賡洛生

之詠掉頭歌梁父之吟固未嘗戚嗟怨懟賦南山種豆
之詩祇自傷流落困窮琢元都訪桃之句豈圖過聽乃
遇知音雖門第極風馬之殊而聲氣有霜鍾之感遊談
借重大筆垂褒青蒿倚長松本自非其偶豚蹄祝甌窶
何所欲之奢茲蓋伏遇侍講中書舍人邃學淵源探六經
之蘊高詞雅興起八代之衰重講肄之席而辨若風生
脫筆吏之腕而詞如泉湧自惟孱陋最辱知憐溉殘朽於
流潤之餘出黥暗於容光之地圭璋借况蒲柳增花敢

緣援手之仁自薦尺書之贄空有望塵之嘆莫申擁篲
之恭

謝兩史舍人啟

上主廣右文之化誤叨稽古之榮羣公輸盡瘁之勞獨
冒素餐之祿豈屏庸之敢望荷識拔之非常伏念某以
卷曲無用樗散之材有留落不偶數竒之相狂愚自用
謗怨所歸名書饕餮之科罪抵驩兇之比已不勝人言
之衆孰云哀榮之不狂固自有論世之公始信治長之

非罪茲蓋伏遇某官學洞九流之邃文追三代之風士
論推崇聖心簡在觀過護人之短持平扶世之偏悼茲
涸轍之窮俾有安巢之願方披帶索羣麋鹿於草莽之
嗟忽被冠纓接鸞皇於雲霄之路每篤相先之意遂叨
不次之恩溫尋舊讀之書已廢十寒之厄策勵平生之氣
詎復存三竭之餘

謝尚書侍郎啟

中禁之寶省恩容寓直上清之淨宇詔許偷安竊以富

貴非其義而千駟之馬弗視焉貧賤不以道而五兩之輪亦泰矣聽蛙鳴於鼓吹之下立緼袍於狐貉之間人見簞食瓢飲之不堪孰知甕牖桑樞之非病某伐木削迹爰矣弗容彘尾跋胡罔知攸措未嘗怨天尤人見愠窮之色但知流行坎止隨任運之緣會上聖求賢如不及之時而羣公觀過有知仁之恕策磨朽鈍庶收十駕之功振拔滯淹或有朋來之福茲蓋伏遇某官追探千載樹經綸之業表儀一世主人物之評處富貴之身若

固有之視貧賤之交無間然矣推仁博愛分德周施收
之爨薪煨燼之餘被以黼黻青黃之飾退思所自為幸
何多雞鶩之贄莫陳徒切仰高之慕犬馬之力將盡尚
思圖報之方

回謝張運使啟

漉懇犯嚴方虞幽黜推恩起廢更累明揚伏念某叢爾
餘生起於罪籍辨市虎之謗已明矣頽杯蛇之影尚惕
然驟置書林迨參賢路猶堪珥筆和南風殿閣之詩詎

可投竿遮西日長安之道茲蓋伏遇運使直閣嘉善容
衆強恕求仁萬頃納汙九河借潤被許于將一言之目
墜陳孟公尺牘之書坐令衰廢之餘復冒許延之寵末
至居右敢忘馬長卿禮遇之隆下坐為榮自倚郭林宗
題評之重

回謝漳守趙中大啟

直承明之廬重叨非據索長安之米自媿無功伏念某
猖狂嬰羅網之拘落拓笑儒冠之悞足一跌之後雖縱

纜而莫收肱三折之餘尚迷途之可復刻肌補過斷尾
求全豈繫躡藉之餘尚玷題評之重起甃浮圖於講席
之上真木居士於叢祠之中拜賜踈然為禮過矣茲蓋
伏遇知府中大忠厚之德追配先民父老之情矜存
故友一函甫逮若奉光塵三讀不休如聆嘉話窮閣改
觀暮齒增華陳義甚高殆過兼金之餽占詞不腆空慚
縞帶之投

回太守周直閣啟

通三殿之班光膺懋寵援列仙之館愧積空餐自憐疲
癯傷敗之餘無復勇銳激昂之意飽於憂患未老先衰
困於語言無罪得禍盍此散地畢此餘生荷識拔之非
常豈頑疎之敢望茲蓋伏遇知府直閣高明昭晰廣大并
包溉病木之根於垂枯脂敗車之轄於既覆偶存殘息
未首一邱曲借餘光坐階華寵青雲岐路固無追驥驟
之心白髮光陰但思逐桑榆之煖

回謝處守謝少卿啟

寓直廬於帝所極儒者之榮進官簿於神庭拜散人之
號疏榮異甚拜祝覲然伏念某漂零三禠之餘顛頓首
難之後繩樞甕牖容膝易安飯豆羹藜沒齒無怨俄墜
黔泥之詔下臨白版之扉接層霄之羽翰而上星槎銀
漢之津指夷途之步武而卧蕙帳草堂之夜雖自謀何
以過此豈僥倖所敢望焉茲蓋伏遇知府少卿文學魯
儒循良漢吏激西江之水涸轍遂蘓隱南山之雷蟄戶
皆震申之嘉惠重以好辭分借餘光曲全暮齒雖遠爭

地實踐華途給札殿中詎敢奏大夫凌雲之賦占詞坐
上猶堪授小兒樂職之詩

鴻慶居士集卷十八